

Ya  
6383



Q. K. 1



Q. N. 140, 1.

Ya  
6383



Q. N. 140, 1.



Ya  
6383







Magdeburg

**Wahrhaftiger Bericht /**  
**Von einer Erschrecklichen vnd abschew-**  
**lichen Mißgeburt / welche den 13. Octob. dieses**  
**1581. Jars / zu Erschlehen gebo-**  
**ren ist.**

**Sampt einer Erinnerung / Was**  
**dabey Christlich zu betrachten.**

Bestellet durch  
**M. Andream Schoppium / Pfarrherrn**  
daselbst.



**Iohan. Cap. 9.**

Vnd Jesus gieng fürüber / vnd sahe einen der Blind gebo-  
ren war / Vnd seine Jünger frageten in / vnd sprachen : Meister /  
wer hat gesündigt / dieser oder seine Eltern / das er ist blind ge-  
boren ? Jesus antwortet : Es hat weder dieser gesündigt / noch  
seine Eltern / sondern das die werck Gottes offenbar würden  
an im.

**Gedruckt zu Halberstadt / durch**  
**Georg Koten.**

*[Faint, illegible text, likely bleed-through from the reverse side of the page]*







Vnſtiger Chriſtlicher Leſer / Dir iſt one  
zweiffel nicht verborgen / Auſs was wichtigen  
vnd in der 3. Göttlichen Schrifft gegründeten  
vrsachen / die Wunderwerck / ſeltzame Zeichen/  
vnerhörte Vngewitter / erſchreckliche thaten / vnd  
abſchewliche Mißgeburt / ſampt andern unge-  
wöhnlichen / denckwürdigen verenderungen / Geſchichten vnd Ge-  
ſihten / ſo ſich in der Luſte / auff Erden vnd Meer / zum offtermal  
zu getragen / durch den öffentlichen Druck / vielen Menſchen mit  
geteilt worden / Sintemal durch viel verſtändige / anſehnliche reine  
Lehrer vnd Scribenten / dieſelbigen vrsachen in vielen Büchern ge-  
ſezet / erl'eret / vnd dermaſſen ausgeſtrichen / das ichs ganz vnnö-  
tig achte / dieſelbigen hie zu wiederholen / Nemlich / das man dar-  
aus erkennen lerne / wie Gott freywillig alle Creaturen ſchaffe vnd  
regiere / vnd an die gemeine ordenung vnd gewöhnlichen lauff der  
Natur / gar nicht gebunden ſey. Item / das derſelbige vnſer Sünde  
vnd miſſethaten / in die lenge nicht werde ſo vngestrafft hin gehen  
laſſen / wie wir vns ſelſchlich oft einbilden / vnd alſo vergeſſen der  
drewung / Wie die Frucht vnſers Leibes / vnd die Früchte der Er-  
den / vnſer Viehe / vnſer fürnemen / vnd alles damit wir ombgehen  
vnd bedürffen / ſollen verflucht ſein / Deut. 28. Item / das ſolche  
Zeichen vnd Wunderwerck vns ſollen leibliche vn ſichtbare Buß-  
predigten ſein / wie Luce 13. zu ſehen. Item / das wir dadurch er-  
innert werden / der Jüngſte tag ſey nu mehr für der thür / Sintemal  
vor der Welt ende / nach Chriſti Weiſſagung / viel vnerhörte Zei-  
chen vnd Wunderwerck geſchehen ſollen. So hat ein jegliches  
Wunderwerck ſeine eigene bedeutung / welche wol Gott alleine  
recht vollkornlich bekand iſt / ſo kan man doch nach anleitung vn  
erkenntnis der 3. Schrifft / vnd aus betrachtung der umſtende / al-  
lerley bedeutung / durch Gottes Geiſt / finden / vnd zur beſſerung  
vnd Gottſeligkeit fromer Chriſten anzeigen / Wenn denn das alſo  
geſchicht / das keine alte Ketzereye vnd falſcher wahn beſteiget /  
noch ein newer Irrhumb / Abgötterey vnd falſcher Gottesdienſt in  
die Kirche Gottes eingefüret vnd verdetiget wird / Sol ein Chriſte  
die erzehlung der Geſchichte vnd die erinnerung / ſo dauon / alſo wie  
2 2 gemelt /

gemelt/ on abbruch der Warheit vnd Christlichen Religion / vnd  
nur zur erbarung der gemeine Gottes / öffentliche Geschicht nicht  
verachten / sondern in warer Gottes fürcht hören / lesen / betrach-  
ten / vnd zu seinem besten gebrauchen. Demnach wil ich hie one  
weitlenfftige erzehlung der vrsachen / Warumb Wunderwerck in  
acht zu haben vnd zu betrachten / kurtzlich vnd warhafftig setzen /  
die vmbstende vnd beschreibung einer Missgeburt / vnd wie man  
damit geberdet vnd gehandelt. Darnach einfeltig vermelden / was  
vns Christen nach Gottes wort in gemein da bey zu betrachten  
gebüre / vnd entlich von den mengeln vnd vngestalt dieses erba-  
lichen Kindleins eine wolmeinliche Christliche erinnerung thun.

Was nu die Historien dieser Missgeburt mit iren vmbstenden  
blanget / helt sichs damit also: Es ligt in der alten Marck zu  
Brandenburg / nach dem Abent vñ mittag / mit des Erzbischofes  
zu Magdeburg gebiete fast allenthalben vmbbringet / auff der ge-  
meinen Land vnd Heerstrassen / zwischen Helmstedt vnd Magde-  
burg / ein alt Schloss vnd Dorff / mit namen Lixleben / welches  
den Edlen / Gest. vnd Ehrn. von Aluenschlebe erblich zu stehet.  
In demselbigen Dorff / hat sich ein Tagelöner mit Namen Hanss  
Euers sampt seiner Hausfrawen Chunne / nu in die 10. Jar / als  
arme Heuslinge / die keine eigen Wohnung haben / bey ander Leute  
wesentlich auffenthalten / vnd sich vñ ire eheliche Kinder mit irer  
hende arbeit erneret. Nu ist gedachte Frawe im vergangenen Winter  
wieder schwanger worden / vnd diesen Sommer vber / irem Mann  
vnd etlichen vertrauten Weibern geklaget / Wie sie sich mit dieser  
Geburt fast vbel befünde / doch gehofft / das ir solches wieder füre /  
weil sie nun etwas alt / vnd in vier Jaren kein Kind zur Welt ge-  
tragen. Es hat sich aber den 13. Octob. dieses lauffenden 81. Jars  
des morgens vmb 8. schlege zutragen / das sie die Wehe Mutter  
vnd andere Nachbarin zu sich gefodert / vnd mit grossen schmer-  
zen / doch eylend / ein Kind zur Welt geborn / darüber sie vnd alle  
Weiber / so bey ir gewesen / sehr erschrocken vnd von hertzen sind be-  
trübet worden / haben nach dem Vater alsbalt gesand / vnd da der  
aus seiner Arbeit daheim kommen / im sein Kindlein gezeiget / der  
nicht weniger drüber erschrocken vnd betrübet worden. Diweil  
auch das Kind gelebet / doch schwerlich den Odem von sich gege-  
ben.

ben vnd zu sich gezogen / hats eine von den Frauen / auff vor ge-  
hendes Christlich Gebett / im Namen der 3. Dreyfaltigkeit mit  
Wasser Getaufft / Nach der Tauffts bald verschieden / als das  
es ungeferlich eine stunde auff dieser Welt gelebet. Dis Kindlein  
aber / so Weibliches geschlecht / ist also gestalt gewesen: Es hat  
vber den ganzen Leib eine braune farbe gehabt / bis es gestorben /  
da ist es weifs worden. Die Füsse / Hende vnd Bauch haben jr na-  
türliche gestalt gehabt / das man auch die Negel sein vnterscheid-  
lich vnd natürlicher gestalt gesehen / Wie denn die Mutter ire zeit  
bis auff vier Wochen / nach irer rechnung / damit gangen / Aber  
der Hals ist im dicke / langk vnd ganz steiff gewesen / das es densel-  
bigen nicht hat können beugen / Derwegen wenn mans mit dem  
Haupt auffgerichtet / ist die Haut vnd fleisch vnterm halse als ein  
Koddert oder Kröse zusammen gangen vñ ganz dicke worden / Es  
hat eine grosse vnd offenstehende Mund gehabt / darzu zwey Aus-  
gen für der Stirn / die im auch sehr weit aus dem Kopff gestan-  
den / vnd nicht ungleich eines schlaffenden Hasen / welche es stets  
einpor gerichtet vñ nie zugethan. Ober den Augen hats kein vorne  
haupt noch schetel gehabt / sondern schlecht herunter gangen / In  
den dünnien oder schlaff des Hauptes zu beyden seyten / hat es grawe  
Haar / wie auff den grauen Mützen / so die Weiber tragen / vnd  
solch haar hats auch an der stete / da andern Menschen natür-  
licher weise die Ohren sitzen / welche dis Kind nicht volkörnlich  
hatte / sondern nur vom Kopff stehende Ohrleplein / so doch hart /  
wie die steiffen Wülste der Mützen / darin etliche Weiber holtz oder  
ander steiffstehende dinge thun / damit die Schwalben schwentze  
irer Mützen / je steiff vnd hoch genug stehen. Zwischen den Ohr-  
leplein / eine blutige Massa oder stücke fleisches / ungeferlich eines  
fingers lang vnd breit / vnten grösser denn oben / vñ also am hinder  
Haupt hangend / das mans kont hin vnd wieder ziehen. Vnter dem  
stücke fleisches war ein Loch / wie eine Speise oder windröre / dara-  
us thet Blut triessen. Die stete da andern Menschen der Rügk-  
knocheligt / war eingebogen / das man wol einen finger drein hette  
legen können / Aber zu beyden seyten stund das fleisch in die höhe /  
als obs ein doppelten Rügknochen hette. Aber an seinem Scham /  
war es so wunderbar geschaffen / welches ich von wegen Frauen  
vnd Jungfrauen zu vermelden vnterlasse.

Diss Kindlein ist von vielen Menschen gesehen / denn fast alle  
Frauen des Dorffs dahin gangen / desgleichen sonst viel andere  
hohe Personen / Ich auch selbst Magister Andreas Schoppius /  
samt meiner Hausfrauen / haben es gesehen vnd begriffen / Es  
ist auch frembden Leuten / so dahin kommen / oder durchgewan-  
dert / nicht geweigert / diss Kindlein zu sehen / welche allesamt be-  
kennen vnd bezeugen werden / das diese erzehlung vnd beschreibung  
dieser Mißgeburt warhafftig sey. Fast gleiche Figur / doch viel  
erschrecklicher / von einer Mißgeburt / zu Basel geschehen / setzet  
Lycosthenes / in seinem grossen Lateinischen Buch von Wunder-  
wercken / vnter dem 1557. Jar.

Es sol sich aber niemand verwundern / das diss Kindlein ge-  
taufft / Denn es ist in der Kirchen Gottes allezeit der gebrauch ge-  
wesen / das man die Mißgeburt / so Menschliche gestalt am wei-  
sten theil des Leibes gehabt / vnd also geschaffen / das sie zu seiner  
zeit / wenn sie erwachsen / der vernunfft gebrauch können / vnd  
sich als Menschen geberden / in Gottes Namen getaufft sein / Wie  
der Hochgelarter Herr D. Andreas Zipperius Lib. 2. seiner Me-  
thodorum Theologicorum lehret vnd zenget. So lesen wir auch  
im Sachsen Chronicon / das vmb das 1312. Jar des H. Ern / eine  
Grewin von Holstein ( denn die Grauen hernach zu Fürsten des  
Reichs gemacht ) eines Ritters Weib / so Zwillinge geboren / des  
Ehebruchs beschuldiget / vnd vnbesonnen gesagt / So möglich es  
ist / das ich so viel Kinder / als Tage im Jar sind / solte zur Welt  
auffein mal geben / So möglich ist es auch / das du zwey Kin-  
der zu gleich / ohn zwey Väter haben soltest. Was geschicht : Gott  
rettete die vnschuld des Weibes / so des Ehebruchs bezichtiget /  
vnd straffte die Grewin / so Gott mit seinen Wercken ziel vnd mas-  
setzen wolte / das sie auff eine zeit drey Hundert vnd Fünff vñ sech-  
zig Kneblein zur Welt gebieret / Ob nu dieselbigen wol fast klein /  
vnd als Krabben gewesen / hat man sie doch mit übersprengung  
des Wassers getaufft / weil sie Menschliche gestalt vnd geschlecht  
gehabt. So stimmt dis mit Gottes wort vber ein / denn Christus  
befielet in Gottes Namen zu teuffen / alle Creaturen / Das ist / alle  
Menschen / da man die schepffung des Menschlichen Geschlechts  
spüret / denn das Wort Creatur / wird Col. 1. auch von den Men-  
schen

schen allein genommen/ vnd ist sonst bekandt / das die Predigt des  
Göttlichen Worts / vnd die verreichung der hechwürdigen Sa-  
crament / allein für die Menschen / vnd sonst für keine andere Crea-  
tur / gestiftet vnd geordnet. Weil denn nu diese Mißgeburt die  
fürnehmsten Glieder des Leibes gehabt / vnd am Heupre nur die  
gebrechligsten mengel gespüret / haben die Frauen recht daran ge-  
than / das sie es in der noht getaufft / Sintemal die Tach tauff / so  
durch verstendige / Christliche Frauen / nach Christi einsetzung ge-  
schicht / in vnsern Kirchen nie gestrafft. Darauff mans auch mit  
gebürlichen Ceremonien zur erde bestetigt / Doch hat man bey dem  
Begrebnis nur gesungen / Mitten wir im leben sind etc. Item / Es  
wolt vns Gott gnedig sein / etc. Denn weil es in Gottes Namen  
getaufft / hat mans billich vnter die zal der rechtglaubigen Chris-  
ten gerechnet / wie die geborne Blinden vnd Lammen / so ferne sie ge-  
taufft / aus der zal der Christen / nicht aus zu schliessen / Sondern  
nach der Geistlichen wieder geburt / darunter sie ja so wol / als die  
gesunden / vnd alle Glieder vnd Sinn habende / allwege von reinen  
Lerern / gezelet sein. | Vnd nach dem begrebnis ist eine kurtze erinne-  
rung geschehen / von dem gebornen Blinden / Johan. 9. vnd damit  
die betrübtte Eltern getröstet.

Was aber von den Wißgeburten / vngewönlicher art vnd vn-  
gestaldten Geschlechter der Menschen zu halten / dauon lasse ich  
die scharffsinnigen Natur kündiger / vnd hoch verstendige Theo-  
logen subtiel disputieren / Vnd wer dauon Augustini meinung wil  
wissen / der mag seine Bücher de Ciuitate Dei, vnd das Enchir-  
ridion besehen / vnd was da stehet / gegen Gottes Wort halten / vñ  
zu seinem besten gebrauchen. Mir gedünckt / wir einfeltigen haben  
gnug an vnseris H. Ern. Christi lehre vnd vnterweisung / was von  
erbarmlichen fallen / vnd erschrecklichem elende der Menschen / so  
wir sehen oder hören / zu halten sey / denn er ist vnser einiger Meister /  
vnd in jm liegen verborgen / alle Scherze der Himlischen weisheit  
vnd erkentnis / Derwegen ein jeglicher jm billich zu hören / vnd von  
jm lernet / was von einem jeglichen ding vnd that recht zu vrthei-  
len / vnd zu richten ist. So lesen wir nu Luc. 13. Es waren aber zu  
derselbigen zeit etliche dabey / die verkündigeten jm ( dem H. Ern.  
Jesu ) von den Galileern / welcher blut Pilatus sampt irem Opffer  
vermischet.

veranisset hatte / Vnd Jesus antwortet vnd sprach zu inen / Meinet jr / das diese Galileer für allen Galileern Sünder gewesen sind / dieweil sie das erlitten haben / Ich sage nein / Sondern so jr euch nicht bessert / werdet jr alle auch also vmb kommen. Oder meinet jr / das die A. h. zehen / auff welche der Thurn zu Siloha fiel / vnd erschlug sie / sein schuldig gewesen / für allen Menschen / die zu Jerusalem wonen / Ich sage nein / Sondern so jr euch nicht bessert / werdet jr alle auch also vmb kommen. Item / Johan. 9. Vnd Jesus gieng für ober / vnd sahe einen der blindt geboren war / Vnd seine Jünger fragten in / vnd sprachen / Meister / wer hat gesündigt / dieser oder seine Eltern / das er ist blind geboren / Jesus antwortet / Es hat weder dieser gesündigt / noch seine Eltern / sondern das die werck Gottes offenbar werden an im.

Auss diesen vnd dergleichen Historien vnd Sprüchen der S. Schrifft / haben wir zu lernen / Das wir gemeinlich die Leute / denen ein gros vngelück begegnet / oder mit mangeln an irem Leibe beladen werden / pflegen für grosse Sünder auszuruffen / Wie auch die Jüden vom H. Ern Christo urteilten / als Esa. am 53. spricht : Es werden sich viel an dir ergern / weil seine gestalt heßlicher ist / denn ander Leute / vnd sein ansehen / denn der Menschen Kinder. Vnd die Leute in der Insulen Melite / (so jetzt Maltta genant wird / von Paulo / da dem eine Otter an die Hand fuhr vnd daran behangen blieb / sprachen / dieser Mensch mus ein mörder sein / welchen die rache nicht leben leffet / ob er gleich dem Meer entgangen ist / Vnd ist nicht one / denn Gott den vbertrettern seiner Gebot gedrewet hat / das die frucht ires Leibes sol verflucht sein / Deut. 28. Derwegen wie zum fluch der Erden gehört / das darauff Dorne / disteln / wickraut / Brantkorn vnd andere Miswachs stehen vnd wachssen / vnd die Erde an vilen örtern Steintig / sandig oder sonst wüste vnd öde ist / oder je sein vermögen nicht bringet / Gen. 3. Also gehört zum fluch des Menschlichen geschlechts / das etliche Menschen vnvolkomene Glieder vnd krefft / gebrechlich / mangelhafftig / vnd mit einer vngewöhnlichen / abschewlichen gestalt vnd art geboren werden / Sintemal Gott nach der Schöpfung alle seine Creaturen selbst angesehen vnd befunden / das sie alle sehr gut / das ist / gantz vollkommen one mangel / gebrechen / vnd feil / lieblich vnd schöne

schöne gewesen. Gen. 1. Da wir aber in der angeschaffenen voll-  
kommenheit vnd reinigkeit nicht geblieben / hat Gott billiche vr-  
sachen / vns mit allerley gebrechen vnd vngestalt an Leib vñ See-  
le zu straffen. Dieweil wir aber oft aus vorwitz von anderer Men-  
schen Sünde fragen / reden vnd gedencken / leret vns Christus / das  
wir / so anderer Leute vnheil vnd gebrechen sehen vnd hören / sollen  
warhafftige busse thun. Denn wie man auff den Sack schlecht /  
vnd meinet doch den Esel / So stellet vns Gott traworige Exempel  
seines zorns / an ander Leute für die augen / damit er nicht so sehr die  
gebrechliche Leute / denen solchs begegnet / als vns / die wir sie sehen  
oder von ihnen hören / eigentlich meinet.

Wir sollen auch Gottes werck an den gebrechlichen Menschen  
also betrachten / das wir Gott für sein geschöpff vnd wolthat / so  
er an vns beweiset / in dem er vns natürliche Menschen gemacht /  
von hertzen danken / Denn wir vnser ersten gebür nach / anderen  
Menschen gleich / vnd Kinder des zorns geboren / wie die andern /  
sagt S. Paulus Ephes. 2. Ja vnser lebens / wandels vnd wercke  
halben / sind wir wol in viel wege böser / vnd in vnserm beruff wol  
vberdrüssiger vnd vngeschickter / dann andere / Wie einem jeglichen  
sein eigen gewissen / neben Gottes wort prediget / Derwegen müssen  
wir bekennen / das vns lauter barmhertzigkeit von Gott wiederfa-  
ren / der vns mit gesund:heit / stercke / guter gestalt / vernunfft / vnd  
andern krefft vnd Gütern / für andern begnadet hat.

Nach dem auch am rechten gebrauch der gaben / gar viel gele-  
gen / sollen wir denselbigen vleissig lernen / vnd in betrachtung vn-  
ser negsten gebrechlichkeit vnd elende / vnd dagegen vnser gaben vñ  
güter / Gott demütiglich bitten / das er vns seine gnade wolle ver-  
leihen / das wir das / so wir von ihm empfangen / stets zu seinem wil-  
len vnd lob / vns / den vnsern / vnd andern Menschen zum besten vnd  
nutz / anwenden vnd gebrauchen mögen.

Endtlich sollen wir Gottes werck / an den gebrechlichen Men-  
schen also betrachten / das wir glauben / Gott werde diese vnd derg-  
gleichen zufelle / schwachheit / vngestalt / schmach vnd elende von  
seinen Außerwelten / nach der algemeinen auferstehung / gewislich  
weg nemen / vnd ire Leibe vollkommen / herrlich vnd reine machen /  
samt derselben waren gestalt vnd eigenschafft / Wie Christus

B

das

das werck hat angefangen vnd beweiset / in dem er einen Mann  
seine verdorrete Hande geheilet / das sie ist gesundt worden / wie die  
ander / Marci 1. Wie er auch eine Frawe / so 18. Jar krum gewesen /  
gesund gemacht / Lu. 13. Dem gebornen Blinden die Augen eröff-  
net Joh. 9. Hat auch sonst viel Lame vnd gebrechliche Menschen  
gereiniget vnd gesund gemamacht. Vnd weil nicht allein dz volck  
sagt / Er hat alles wol gemacht / Sondern auch David bekennet /  
das der H<sup>er</sup> all vnser gebrechen heile. Psal. 103. So wirdt auch  
nichts gewissers sein / das in der aufferstehung / vnser Leibe on alle  
gebrechen / vngestaltt oder mangel / dem verklärten Leibe Christi  
ehnlich sein werden / nach der krafft / damit er in alle ding kan vn-  
terthenig machen. Phil. 3.

Was aber sonderlich bey dieser Mißgeburt zu betrachten / ist  
schwerlich recht zu treffen / Denn Gott allein die bedeutung seiner  
vngewöhnlichen wercke / in gemeinlich fürbehelt / vnd aller erst /  
nach dem er sie erfüllet / klerlich zuuerstehen gibt / was er damit mei-  
ne. Wenn wir diese Wundergeburt auch zur besserung / vnd waren  
busz zur danck sagung vnd gebet zu Gott / zu betrachtung Gottes  
allmacht / gerechtigkeit vnd gerichte / wie zuvor gerüret / Christlich  
gebrauchen / sollen wir das heimliche Gotte befehlen / vnd vnser  
Glaubens vnd lebens / nach Gottes Wort war nemen. Do ist es  
nicht vndienstlich / das man von der gestalt / nach anleitung des  
h. Geistes / vnd betrachtung der vmbstende / etwas vermelde / vnd  
zur besserung / warnung / lere / vnd waren Gottseligkeit / frommen  
Christen anzeige / so das geschicht / ist solche arbeit nicht vergebens.

So halte ichs nun dafür / das diese Mißgeburt sonderlich den  
Weibs personen / zur straffe vnd warnung / von Gott für die Zu-  
gen gestellet sey / sintemal es desselbigen geschlechtes gewesen / vnd zu  
dieser zeit leider viel Frawen / Jungfrawen vnd Megde / sich mit  
jren Helsen vnd Köpffen / an Gott mercklich versündigen / in dem  
das sie mit auff gerichtten Helsen gehen / als wenn jnen ein steiff  
Pfal darein geschlagen were / oder je so dicke Kantzeln oder Kröse  
vmb den Hals tragen / das man jnen denselbigen nicht sehen kan /  
auch damit jr Angesicht biss vber die Ohren vnd Wangen bedec-  
ken / das man kaum jren Mund / Nasen vnd Augen siehet / sich als  
so scheusslich verstellen / das sie schier den Eulen gleich sein / Welche  
Gesne



Gefnerus/ Eberus vnd Peucerus nicht ohn vrsache Schleyer Lur-  
ley/ auff Meissisch/ vnd Ransulen auff Sechsisch heissen. Denn  
wie solche Lulen aus sehen/ so verstellen sich jetziger zeit die Leute/  
mit iren hohen/ vielfeltigen Ranzeln vnd Krösen / so sie vmb den  
Hals her tragen/ Welche art vngesehrlich Anno 1566. erstlich in  
den Pommerischen vnd Meckelburgischen Höfen gespüret/ vnd her  
nach in andere Sechsische Höfe/ Städte/ Dörffer vnd Gemeine ge-  
bracht/ vnd nun also eingerissen vnd vberhandt genommen/ das  
sie schwerlich wird wieder ab zuschaffen sein / wo Gott nicht mit  
einer sonderlichen straff vñ armut vns heim sucht. Zu dem wenden  
die Frawens personen auff die grawen Mützen/ Hauben/ Kneu-  
ste vnd Wülstcken jetz so viel/ das nicht zu sagen ist/ Es darff ei-  
nes gemeinen vnd geringen vermögens Handtwercks oder Bau-  
wers Frawe jetz wol eine grawe Mützen für fünff oder sechs Da-  
ler/ einen Schleyer vmb einen Daler kauffen/ Was sie spinnen/ das  
achten sie gering/ es mus jetz eytel Hollendische vnd Schwebische  
Leinewad sein / Eine gestrickte Haube für anderhalben oder wol  
zwey Daler müssen sie auch haben/ Was man an die gülden Haub-  
ben/ Perlen bende/ Haerschnüre/ Zöff vnd Bänder vnter dem Halse/  
vnd anderen zier ober die gebürende masse / eines jeden standes wen-  
de/ vnd vnnützlich vergeute/ ist aus hellen Tage / vnd mehr zu be-  
klagen/ denn mit Worten zu erzelen/ Desgleichen was die Frawen/  
Jungfrawen vnd Megde jetz mit Seiden geband/ Schürzseilen/  
Beuteln vnd andern dinge mehr für hoffart vnd üppigkeit treibē/  
ist offenbar/ Daher denn auch gewisslich eine grewliche straffe er-  
folgen wird. Wie Salomon Pron. 16. sagt. Wer zu grund gehen  
sol/ der wird zunor stolz/ Vnd stolzer muht kömpt vor dem fall.  
Vnd Isa. 3. stehet. Vnd der Herr spricht/ Darumb das die Töch-  
ter Zion stolz sindt / vnd gehen mit auffgerichtem Halse / mit ge-  
schminckten Angesichtern/ tredten einher/ vnd schwenzen/ vnd ha-  
ben köstliche Schuch an iren Füßen/ So wird der Herr den schen-  
ck der Tochter Zion kahl machen/ vnd der Herr wird jr geschmie-  
de weg nemen. Zu der zeit wird der Herr den schmuck an den köstli-  
chen Schuen weg nemen/ vnd die Hefste/ die Spangen/ die Ketten/  
die Arm spangen/ die Hauben/ die Flietern/ die Gebrame/ die schnür-  
hün/ die Bysem epffel/ die Ohren spangen/ die Ringe/ die Herband/  
die

die Feyer Kleider/die Mantel/die Schleyer/die Beutel/die Spiegel/  
die Koller/die Kittel/ Vnd wird stank für gut geruch sein/ Vnd  
ein lose Bandt für ein Gürtel/ vnd eine glatze für ein Kraus Haer /  
vnd für einen Mantel ein enger Sack / solches alles an stad deiner  
schöne. Dein Pöbel wird durchs Schwerdt fallen/vnd deine Krie-  
ger im streit. Vnd ire Thore werden trawren vnd klagen / vnd sie  
wird jemmerlich sitzen auff der Erden etc. Dis ist eine ebene scharf-  
fe Lektion/darin Gott selbs der Weibs bilder vbermessenigen pracht  
vnd schmuck erzelet/ vnd stück wais setzet/ dazu inen die verdiende  
straffe für helt / das er jr Geschmeide vnd Wollust wolle weg ne-  
men/vnd dafür böses geben / Nemlich / für die wol riechende By-  
sem Epffel einen gewolichen stank/für die engen Gürtel lose ban-  
de/vnd für den weiten Mantel/einen engen Sack. Es sollen auch  
ire Mummer/die solche hoffart irer Weiber vnd Töchter nicht ge-  
straffe/noch abgeschafft haben/ im Kriege von den Feinden erle-  
get vnd getödtet werden etc. Es werden die Menner/so sich auff  
gut Weibisch putzen/ mit den dicken Krösen oder Kantzen / vmb  
den Hals vnd Henden/vnd sonst mit andern Kleidern sich verstel-  
len/als wann sie Puppen/ zugerichte Mennlein/ vnd zum Kinder-  
spiel angethan weren/gewislich auch gestrafft werden/ denn Got-  
tes Wort leuget vnd trauget nicht / sondern bestehet vnd bleibet in  
alle ewigkeit/ Wer dem gleubet vnd folget/der wird es hie zeitlich/  
vnd dort ewiglich genieffen/Wer aber dasselbige/ auch seine wun-  
derthaten verachtet /der wird seinen verdienten lohn gewislich be-  
kommen. Wie wir denn gewoliche Exempel teglichlich hören/das  
die Liefflender/die Littawer/ die Brabender/ vnd andere Natio-  
nen/von den Muscowitern/ Türcken vnd andern feinden/jemmer-  
lich geiaget/beraubet/ gefangen/ gewürget/ vnd ire Lender zu ris-  
sen vnd verdorben werden.

Der allmechtige Gott wolle vnser Herten' erleuchten / das  
wir an dieser Wunder geschicht vnser Sünde erkennen / vnd ins  
Glauben vnd mit gereinigtem Herten / ware busse thun.

Solches verleibe vns die heilige Dreyfaltig-  
keit/Gott Vater / Son vnd heis-  
liger Geist.

A M E N.

Pou Ya 6383, QK

ULB Halle

3

003 601 331





Inches 1 2 3 4 5 6 7 8 9 10 11 12 13 14 15 16 17 18 19 8

Centimetres

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

Magdeburg

Wahrhaftiger Bericht/  
Von einer Erschrecklichen vnd abscheu-  
lichen Mißgeburt/ welche den 13. Octob. dieses  
1581. Jars/ zu Erschleben gebo-  
ren ist.

Sampt einer Erinnerung / Was  
dabey Christlich zu betrachten.

Bestellet durch  
M. Andream Schoppium / Pfarherrn  
daselbst.



Iohan. Cap. 9.

Vnd Jesus gieng fürüber/ vnd sahe einen der Blind gebo-  
ren war / Vnd seine Jünger frageten in / vnd sprachen: Meister/  
wer hat gesündigt / dieser oder seine Eltern / das er ist blind ge-  
boren? Jesus antwortet: Es hat weder dieser gesündigt/ noch  
seine Eltern / sondern das die werck Gottes offenbar würden  
an im.

Gedruckt zu Halberstadt/ durch  
Georg Koten.